

# Perdana Menteri Australia minta maaf

**KUALA LUMPUR, Sabtu.**— Perdana Menteri Australia, Encik Malcom Fraser, meminta maaf kepada Perdana Menteri, Datuk Seri Dr. Mahathir Mohamad sambil mengutuk siaran radio Perbadanan Penyiaran Australia stesen Brisbane (ABC) yang menyiarkan berita menyinggung Perdana Menteri Malaysia.

Encik Fraser mensifatkan siaran itu sebagai "insiden yang sangat dikesali dan tidak menyenangkan".

Kementerian Luar Negeri dalam satu kenyataannya, berkata surat meminta maaf dari Perdana Menteri Australia itu di terima oleh Perdana Menteri, Datuk Seri Dr. Mahathir Mohamad.

Dalam suratnya, Encik Fraser dan kabinetnya menyetujui kenyataan Menteri Luar Australia, Encik A.A. Street yang mengutuk siaran tersebut sebagai "bodoh dan menyinggung" rakyat Australia dan Malaysia.

Siaran radio yang menyentuh Datuk Seri Dr. Mahathir Mohamad itu dibuat pada 4 September lalu setelah Perdana Menteri mengumumkan beliau tidak akan menghadiri sidang ketua-ketua Kerajaan Komanwel di Melbourne lewat bulan ini.